

REGIONAL NEWS BULLETIN

HEADLINES (MORNING)

1. Chief Minister Pu Lalduhoma hovin Mission Governing Council of Mizoram State Skill and Entrepreneurship Development Mission thutkhawm vawi khatna neih a ni.
2. Ramchhunga sorkar damdawi in tha bik thlan zingah Siaha District Hospital leh Lawngtlai District Hospital bakah East Lungdar PHC leh Phuaibuang PHC te an tel.
3. Prime Minister Narendra Modia chuan khawvelin harsatna hrang hrang hmachhawnte chinfel kawngah India-ah thui tak a innghat a ti.
4. President Draupadi Murmu-i chuan ni hnih cham turin nimin tlai khan Odisha khawpui Bhubaneswar a thleng.

<><><>

MISSION GOVERNING COUNCIL

Mission Governing Council of Mizoram State Skill and Entrepreneurship Development Mission te chu a vawi khat nan an chairman Chief Minister Pu Lalduhoma hovin CM Conference Hall-ah an thukhawm.

Member Secretary, Pu Lalmalsawma Pachuau, LESDE Secretary chuan Mizoram State Policy for Skill & Entrepreneurship Development 2018 tihhlawhtlin nan sawrkar chuan Mizoram State Skill & Entrepreneurship Development Mission (MSEDM) a din thar a. He thukhawm Mission Governing Council, Chief Minister Chairman na hnuai mi hi MSEDM a thuneitu sang ber a ni. India ramah skill development hi mission anga kalpui chhoh mek a ni a, MSEDM chuan Mizoram sawrkar hnuai skill development lam kalpui department te mumal leh lian tham taka mission pakhat hnuai kalpui dan a dap dawn a ni.

Meetingah hian Labour, Employment, Skill Development & Entrepreneurship Department, DAY NULM, MzSRLM, Mizoram Startup Mission leh Commerce & Industries department ten skill development an kalpui dan te an tarlang.

Meeting-ah hian Governing Council Vice Chairman Pu Lalnghinglova Hmar, Minister, LESDE, Pu Khilli Ram Meena, Chief Secretary leh member dang te an tel a ni.

(DIPR)

<><><>

WOMEN& CHILD DEVELOPMENT

Women & Child Development Minister Pi Lalrinpuin nimin khan Mizoram district tin tana ‘Widow Cell’ a tlangzarh.

National Human Rights Commission in Centre, State leh UT sorkar hnena hmaithai te dikna chanvo humhim nan leh an hmakhua ngaihtuah sakna hmanrua atana Widow Cell din tura thurawn a pek bawhzuina a nih thu Minister chuan a sawi a. Heti hian Mizoramah chuan Widow Cell hi district tin a One Stop Centre tinah din nghal a ni a ti.

Minister chuan Widow Cell-in a tum ber chu hmeithaite hmasawna tura kawng hrang hranga hmalakna bakah, hmalakna awmsa tih chak leh hmeithaite, an hmalam hun atana ruahmanna tha ngaihtuah sak a nih thu a sawi a. Hmeithai-te dikna chanvo humhalh anih theihna turte, harsatna tawkte’n an kawng an sah en theihna tura kawng lo kawhmuha lo puitu ni turte leh, hmeithaite thlamuanna thlentu an lo nih theihna turin Widow Cell chu tangkai taka hman a nih a beisei thu a sawi a ni.

Women Cell kaltlang hian eizawna neilo ten ei an zawn theih nan thiam thil zirna lo ngaihtuah pui te, mipuite tana hamthatna scheme hrang hrang sorkarin a kalpuite lo hrilhhriat a

ngaihtuahpui te, an mamawh dan azir a psychological counselling pek te, Dan hmaa an dikna chanvo an hum theih nan legal counselling pek te bakah adangte a huam tel thu hawnna inkhawmah hian tarlan a ni a. Mizoram chu India ram State zingah Widow Cell din hmasa pawl a nih thu tarlan a ni bawk.

(DIPR)

<><><>

HOSPITAL RANKING

India rama sorkar damdawi in tha bik thlan zingah District Hospital pahnih – Siaha District Hospital leh Lawngtlai District Hospital leh Primary Health Centre pahnih – East Lungdar PHC leh Phuaibuang PHC te an tel.

National Health Mission, Health & Family Welfare Department atanga thu dawn danin, India rama sawrkar damdawi in tha bik tehna, National Quality Assurance Standards (NQAS)-ah Siaha District Hospital, East Lungdar PHC leh Phuaibuang PHC te chu an tling a ni. A hmam Aibawk PHC, Thingsulthliah PHC, Civil Hospital Aizawl, Civil Hospital Lunglei, Champhai District Hospital, ITI UPHC, Chawlhmun UPHC, Haulawng PHC leh Sialhawk PHC te an lo tling tawh bawk.

NQAS-a tling tur hian state level leh national level atangin tehna hrang hrang paltlang a ngai a; tehnaah hian Siaha District Hospital-in zaa 92.53 hmiun, Lawngtlai District Hospital hian zaa 88.08 an hmu a, East Lungdar PHC-in zaa 89.29 an hmu a, Phuaibuang PHC-in zaa 84.23 an hmu thung.

Siaha District Hospital hian damdawi in puma NQAS an hmuh bakah hian India rama nau neihna hmun tha bik leh inzaina hmun tha bik tehna LaQshya certificate an hmu tel a, LaQshya bikah hian Platinum Certificate an dawng pha a ni. Hemi bakah hian naupang damlo enkawlina hmun tha bik tehna, MusQan -ah an tling bawk a ni. Lawngtlai District Hospital pawh hian LaQshya certificate an hmu tel bawk.

NHM, Mizoram chuan, India rama damdawi-in tha bik thlan chhuah zingah Mizorama damdawi in an awm belh zel chu Department leh Mizoram tan mellung pawimawh a nih thu leh thawktu zawng zawng te thawhrimna leh taimakna chhuanawm an tih thu an sawi bawk.

(DIPR)

<><><>

BANGLADESH

Bangladesh atanga Bawm raltlan mi 28 te chu Tuithumhna a, 20 Assam Rifle Post-ah tunah hian him taka enkawl an ni.

Thudawna in a sawi danin heng raltlan te hi Kristmas leh kumthar hunpui chhung zawng khan ramhnuaiyah kalin Vathuampui hi an pan a, an mahni hi Bawm hnam niin nausen leh kum tling lo an awm nual a, kum tling chin chu kum 50 aia upa an awm lo niin a sawi.

Hruitezawl VCP Pu Rinsanga chuan heng mite hi Sipai camp ah va tlawhin sipai ten an enkawl tha a, chaw leh eitur, mutbu leh damdawi chenin an pe tha niin a sawi a, thenkhat in Burma atanga lo lut ni a an sawi chu thil theih loh leh a kalkawngah pawh tihngaihna awmlo niin Akasvani Lunglei a hrilh.

(Thangmingliana Lunglei PTC)

<><><>

JAN SURAKSHA

Kolasib DC Conference Hall-ah Bawrhap Pu Robert C Lalhmangaiha hoin ramchhunga mi harsate tana social security scheme pawimawh te phochhuahna tur Jan Suraksha Scheme hnuai Kolasib district-a hmalak dan enho a ni.

He thutkhawm, District Level Consultative Committee Meeting on Campaign for Jan Suraksha Schemes at Gram Panchayat level review-ah hian Bawrhap chuan District Level Consultative Committee (DLCC) te chu mipui rawngbawltu an nih angin Sawrkar-in mipuite tana hamthatna a ruahmante kawhmuh leh hrilhfiyah ngaite hrilhfiaktu an ni tih hre reng turin a chah a. DLCC Member kalkhawm te chu Bank leh Financial Institution lama a chinchang hretute an nih ang ngeiin mipuite zirtirna petu pawimawh tak an nih thu a sawi a ni.

Jan Suraksha Schemes Campaign hi Ministry of Finance hnuai awhmin thla thum chhung; ni nikum Oct ni 15 atanga tun thla ni 15 chhung a neih tura ruahman a ni a. Hemi hian a tum ber chu tuna Social Security Scheme pahnih awm mek Pradhan Mantri Jeevan Jyoti Bima Yojana (PMJJBY) leh Pradhan Mantri Suraksha Bima Yojana (PMSBY) hamthatna dawngtu tihpun leh Village Council/Gram Sabha tina Campaign neih a ni a. Heng an hmalakna leh an Mapping tih tawh te hi Jansuraksha Portal ah update thin a ni.

Kolasib District chhungah Jansuraksha Campaign hi District chhunga Bank hrang hrang 21 ten an kal pui mek a. PMJJBY hnuai Campaign Target Achievement 865 chu 1232 in an khum tawh a. PMSBY hnuai Campaign Target Achievement 1006 awm chu 1385 in an khum thei bawk a ni. Tun dinhmunah Village Council 52 ah Jan Suraksha Campaign hi kalpui tawh niin, Campaign kalpuina tur Village Council 4 ah a la awm a. Tun thla ni 15 hmaa Jan Suraksha Schemes Campaign hi Kolasib District-ah zawh hman tur in he thutkhawmah hian rel a ni bawk.

(DIPR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

(Desk)

<><><>

PM

Prime Minister Narendra Modia chuan khawvelin harsatna hrang hrang hmachhawnte chinfel kawngah India-ah thui tak a inngat a ti. Nimina Genomics Data Conclave, Delhi-a neihah video hmanga thuchah sawiin Pu Modia chuan Genome India Project chuan ramchhunga biotechnology dinhmun a rawn thlak danglam a ti a Kum zabi 21-a biotechnology leh biomass infin chu India tan Bio Economy tihmasawn kawngah lungphum pawimawh tak a ni a ti a. Kum 10 kalta chhungin bio-economy chu US dollar tluklehdingawn 10 atangin tluklehdingawn 150 ah a kai tawh a ti bawk.

He hunah hian Science and Technology Minister Dr.Jitendra Singh-a chuan Framework for Exchange of Data Protocols leh IBDC Data Access Portal a hawng nghal bawk a ni.

(Newsonair)

<><><>

PRESIDENT

President Draupadi Murmu-i chuan ni hnih cham turin nimin tlai khan Odisha khawpui Bhubaneswar a thleng a. President Murmu-i chuan a chawrchhuahna Odisha state a thlen hian Governor Hari Babu Kambhupati , Chief Minister Mohan Charan Majhi leh sawrkar mi pawimawhten Biju Patnaik International Airport ah an lo hmuak a ni.

Nimin vek khan Prime Minister Modia'n Odisha-ah hian Pravasi Bhartiya Divas Convention vawi 18-na Bhubaneswar ah hian a hawng a ni. Thusawiin Prime Minister Narendra Modia chuan kum 2047-a ram changkang ni tura hma laknaah rampawna awm India mite chu an pawimawh hle a ni a ti. Khawvel pum ang pawha hmasawna kawngah India mi rampawna khawsaten an thawhhlawk hle a ti a. India ram than zelnaah pawh an thawk tha hle tih sawiin khawvel hmaah ram palai hna tlin takin an thawk a ni a ti bawk.

(Newsonair)

<><><>